


BUBU YAYI DISONUKU

YAYI ME LUNGA

 Matondo na nge, Mpangi Demos, Mpangi Carl Shakarian, to, Demos Shakarian, Mpangi Carl Williams, mpe bimonikisi, nionso. Mu ke banza kaka ti mpangi-bakala, bakala yayi ya mubundudi-ntoto awa, me tuba kaka yina mu zolaka tuba, na nkokila yayi, ti yandi bakaka kaka ndinga ya munu mbala mosi na munu. Samu ti, mu me sepela na yayi, mu banza, lukutakanu yayi, kulutila lukutakanu nyonso yina mu me vwandaka ntete. Mu me monaka ntete ve, na lukutakanu mosi, na ngwisani mingi mpe kubundana ya kieleka mpe zola ya bampangi. Kima yankaka yina mu salaka, mu me kutanaka na bimonikisi mingi ya malu-malu ya Mazulu, bampangi ya malu-malu yina mu kuzwaka bweso ya kupesa mbote mpe kuzonza.

² Kaka bampimpa fyoti me luta, mu vwanda kuwa mpangi-bakala ya Baptiste yina kele ya kuvwanda kuna. Mu ke banza ve nkumbu ya yandi. [Mpangi Shakarian me tuba, “Irvin.”—Mu.] Irvin. Mpe yandi me nata kalati na munu na . . . Mu ke kwikila ti ya kele tata ya yandi ya kento, yina kele ya kuvwanda awa na nkokila yayi. Yandi me simba kalati yina ya bisambu bamvula makumi zole.

³ Ba nataka yandi na lukutakanu, vwanda kufwa na kimbevo, ti mu banza dokotolo lendaka tendula yina yawu kele. Ya kele kima mutindu kimbevo ya lèpre, kasi ya kele ve lèpre. Beno kaka . . . Ya kele na lipaso, ba lendaka zenga mwa nsinga mosi awa, to kima mosi, kasi yandi zolaka vwanda kaka mutindu kimenina, yandi zolaka vwanda kuna. Mpe ntangu yandi vwandaka ya kuvwanda kuna, mu banza ti kalati ya yandi ba bokilaka ve to kima mosi ve, yandi kotaka ve na ndonga ya bisambu, Mpeve-Santu twadisaka munu na yandi. Mpe yandi kele kuna na manima na nkokila yayi, yandi kele mbote, mpe beto ke vutula matondo mingi samu na yawu.

⁴ [Mpangi Shakarian me tuba, “Mpangi-bakala, mu banza—mu banza ti Howard Irvin vwandaka kuna ke tuba na nge, kasi mu banza ti tata ya kento kele awa. Mu banza ti beto lenda lomba ti yandi telama.”—Mu.] Beno zola kutelama? Tata ya kento ya . . . [“Yandi yayi. Beno ningisa diboko ya beno. Beno ningisa diboko ya beno.”]

⁵ Nzambi sakumuna nge, mpangi ya munu ya kento, samu na lukwikilu ya nge ya nene na Mwana ya Nzambi. Bika ti Yandi bumba beno mbote tii ntangu Yandi ke bokila beno na Yinzo, ntangu muntu yayi ya kufwa ke lwata yina ke kufwa ve. Mu

ke vutula matondo mingi samu na yawu, na kubanza ti yandi simbaka kalati yina bamvula nyonso yayi ntangu yayi, mpe na yina ba nataka munu awa mpe talisaka munu na nkokila yayi. Beno zaba, mu vwandaka tuba, ya kele mutindu dimpa na zulu ya maza, ya ke vutuka na beno, ntangu beno ke meka na kusala kima mosi samu na muntu yankaka.

⁶ Ntangu yayi, mu me kuzwa mpe bweso ya kukutana na milongi mingi yayi ya mbote, mpe kieleka mu ke sepela na ngwisani ya bawu ya mbote, kusala kintwadi yayi. Mpangi Carl zabisaka munu na kuvutuka mvula ke kwisa, kana Mfumu kuzola, mpe beto kele awa na zulu ya ntoto. Mpe, mbote, mu banza kukutana mosi na mosi ya beno awa mvula ke kwisa diaka, mpe mosi na mosi ke nata kimonikisi yankaka na yandi mpe na yandi.

⁷ Ntangu yayi ya kele kaka na kima mosi yina mu ke zola kutuba mwa kima mosi samu na yawu, mu banza kaka mwa ntangu fyoti.

⁸ Samu, Dokotolo Reed ke tuba na manima, mpe mu me kwisa tii awa na nkokila yayi, Mu me sala bakilometele bankama zole na makumi yiya na tanu yina mu. . . samu na kusala nzyetolo yayi, samu na kuwa Docteur Reed. Mpe kima mosi kaka salamaka ntama mingi ve ti mu ke. . . Kasi—kasi, Docteur Reed, mu ke nata ditoma bakilometele mafunda tanu na kuwa yandi. Kasi kima mosi me. . . Kubanda mu me vwandaka awa, mu ke zola kunata ditoma bakilometele mafunda kaka samu na kuwa yina mu me kuwaka mwa ntangu fioti me luta, kima mosi ya ke yitukisa, kima yina nsuni mpe menga lenda monisa ve. Ya ke lomba Mpeve-Santu kusala yawu. Mpe kumona muntu yina ke pesaka ngolo na luzingu ya munu na mutindu mosi, mpe kieleka mu ke vutula matondo mingi luzingu ya munu nionso.

⁹ Yina mu zolaka tuba, vwandaka—vwandaka, kana mu zolaka sala lipaso, kubokila dokotolo mosi ya medesine, nge—nge kwisaka na munu, Dokotolo Reed, ntama mingi ve. Mu—mu lenda tula kivuvu na bakala yina na kusala lipaso, kana mu fwana kuzwa mosi, maboko yina ke kwikilaka na Nzambi, yina—yina ke vwanda yina mu ke zola kusala na zulu ya munu. Mpe na yina beto. . . Mu ke tula kivuvu ti mu ke vwanda na yawu ata fioti ve. Kasi kana mu sala yawu, mu ke zola yandi, to muntu mutindu yandi, samu na kusala kisalu, kana yandi lendaka vwanda kuna ve.

¹⁰ Mu vwandaka na kima mosi yina salamaka mazono na nkokila, yina, to mazono na manima ya midi, mu zolaka tuba, yina vwandaka kieleka mutindu ya ngitukulu samu na munu. Mpe mu ke vwanda nkufi, samu ti mu zola ve kubaka ntangu ya mpangi ya munu ya bakala, mutindu yandi ke zonza. Kasi mu banza ti ya kele mutindu ya kubwela na ministele ya munu.

¹¹ Mu—mu ke talaka bima ya fyoti. Kaka kima nyonso ya fyoti zola kutuba, samu na munu. Mu ke kwikilaka ve ti kima mosi ke salamaka na Muklisto na siansi. Mu banza ti ya kele ya kutumama na Nzambi, samu ti Yesu tubaka ti Yandi ke sala bima nyonso kutambula kintwadi samu na mambote ya bayina zolaka Yandi. Na yina mu ke kwikila ti konso kima yina na—na mwa ministere ya kukikulumusa yina Yandi pesaka munu, samu na kusadisa beno bantu, samu na kusadisa muntu nionso, mpe beno nionso kele lusalusu samu na munu, samu na kusadisa mosi na yankaka na kukuma na Nkembo. Na yina, kima nyonso ya fyoti zola kutuba, samu na munu. Kasi ya vwandaka mpasi samu na munu na kukwikila yawu, mazono na manima ya midi, ntangu mu zimbisaka dilongi ya munu awa. Mu—mu ke tuba na beno, mu me kotaka ata fioti ve na luzingu ya munu. Mpe, na yina, kento ya munu—ya munu pesaka munu Biblia ya malu-malu samu na Nowele.

¹² Kiboba ya munu vwandaka ya kulemba mingi. Mu vwandaka na Yawu pene ya bamvula makumi zole ntangu yayi, ba pesaka munu yawu na nzila ya bantu ya Houston Gospel Tabernacle, bamvula mingi me luta, ntangu mu bandaka na ba-campagne. Mpe na yawu mu kaka, mu ke zolaka Yawu mingi, mpe mu . . . makasa mpe ba-page, na kusabukaka mubu, mpe kubaluka, tii mu . . . ya kele kaka kuyambula. Mpe mu ke baka page mu banza na Genèse, mpe mu fwana tala na manima na Deutéronome kisika mosi samu na kumona yawu, beno zaba, kisika wapi mu kotisaka kaka yawu na kati ya Biblia. Na yawu, yandi kuzwaka munu mosi samu na Nowele. Mpe mu yinaka na kutula Buku ya ntama na lweka, Ya vwandaka mingi ya luzolo samu na munu. Mu tubaka, “Kana mu me kwenda na ntwala ya Yesu kwisa, tula Yawu na zulu ya munu. Bika ti Yayi kulumuka na munu, mpe mu ke mata na Yawu ntangu beto ke mata.” Na yawu kuna, ya kele dibanza ya munu, na mutindu nyonso.

¹³ Mutindu mu vwandaka tuba mwa disolo mosi. Mu banza ti yayi kele kuvweza ve. Kasi mu kwendaka na . . . Muntu mosi tubaka na munu kilumbu mosi, mu ke kwikila ti ya vwandaka Mpangi Earl Prickett, lukutakanu mosi na New York; mpe mu kutanaka na bakala mosi, yandi tubaka, “Tala, yinki nge ke sala na bantu ya mumbongo yayi, nge kele longi?”

Mu tubaka, “Mu kele muntu ya mumbungu.”

Mpe yandi tubaka, “Wapi mutindu ya mumbongo ya nge?”

¹⁴ Mu tubaka, “Assurance.” Ntangu yayi, yandi banzaka ti mu tubaka, “ba-assurance,” beno me mona. Na yawu mu tubaka, “Assurance.”

Yandi tubaka, “Oh, wapi mutindu ya ba-assurance nge ke tekaka?”

¹⁵ Mu tubaka, “Luzingu ya Kukonda nsuka.” Seko! Yandi tubaka, “Mu ke teka Yawu ve. Mu kele kaka muntu ya assurance,

munu mosi, mpe mu ke meka na kutalisa Yawu na bantu yankaka.”

¹⁶ Beno bambuka moyo na mwana-bakala mosi mu kwendaka na lukolo na yandi, kilumbu mosi, mpe yandi vwandaka muntu yina ke tekisaka ya assurance. Ntangu yayi, assurance kele mbote, kasi mu kele na mosi ve. Na yina, na yina yandi kwisaka na yinzo ya munu, mpe yandi tubaka, “Billy, mu ke zola kutekisa na nge assurance mosi.” Yandi tubaka, “Mu zaba mpangi ya nge ya bakala.” Mpangi ya munu ya bakala ke tekaka samu na Metropolitan. Yandi tubaka, “Mbote,” yandi tubaka, “Mu zola, mu ke zola kutekila nge assurance mosi.”

Mu tubaka, “Oh, Wilmer, matondo na nge.”

¹⁷ Mpe beno ke . . . yandi lenda vwanda awa na nkokila yayi, mpangi ya yandi ya bakala, yandi sonikaka bima na *Kivinga Ya Zulu*, buku, *Kivinga Ya Zulu*. Na yawu yandi . . .

Mu tubaka, “Mu ke na assurance.”

Yandi tubaka, “Yinki?”

¹⁸ Mpe kento ya munu talaka munu mutindu kana mu vwandaka muntu ya luvunu. Yandi . . . mpe mu tubaka . . . Na yina yandi tubaka, “Billy?”

Mpe mu tubaka, “Yinga, uh-huh, mu ke na assurance.”

¹⁹ Mpe yandi tubaka, “Oh, lemvočila munu—lemvočila munu,” yandi tubaka, “Mu salaka yawu ve . . . Mu kuwaka ti nge vwandaka ve na assurance.”

Mpe mu tubaka, “Ve, mu ke na assurance.”

²⁰ Mpe—mpe yandi kangaka munu, yina mu tubaka kuna. Yandi tubaka, “Yinki nge me tuba?”

“Mu tubaka, ‘Assurance.’”

Mpe yandi tubaka, “Mbote, yinki nge zola kutuba?”

²¹ Mu tubaka, “Kivuvu ya kusakumuka, Yesu kele ya munu; oh, wapi mutindu ntomo ya mantwala ya nkembo ya Kinzambi! Mu kele kibiyadi ya mpulusu, Nzambi futaka; ya kubutama na Mpeve ya Yandi, ya kusukula na Menga ya Yandi.”

²² Yandi tubaka, “Billy, nge zaba ti mu ke sepela na yawu.” Yandi tubaka, “Yina kele kima ya mbote mingi. Kasi,” yandi tubaka, “mwana, yina ke tula nge ve na kati ya maziami awa.”

²³ Mu tubaka, “Kasi Yawu ke basisa munu.” Mu ke na boma ve, ya ke kwamisa Munu ve na mutindu mu ke kota kuna; ya kele kubasika kuna, beno me mona. Na yawu mu banza ti ya kele mutindu beto ke kuwaka na zulu ya yawu.

²⁴ Mazono na nkokila, ntangu mu bakaka Biblia yina, mpe mu lendaka ve kuzwa dilongi yina. Mpe mu bakaka Biblia yina ya malu-malu. Mu tangaka yawu na yina ya ntama, mpe mu tulaka yina ya malu-malu mpe mu tulaka Yawu na yisi ya diboko ya

munu mpe mu kimaka mbangu awa. Mpe mu balukaka na kisika yina, mpe mu banzaka, “Mbote, awa, mu banza ti ya vwandaka Santu Jean 16:21,” mpe ya vwandaka ve kutanga ata fioti.

Mu tubaka na Mpangi Moore, “Ya kele kisika yina?” “Yinga.”

²⁵ Mpe mu talaka na manima, mpe ya vwandaka kuna ve. Na yina mu banzaka, “Mbote, ba kele na page ya kulutila yimbi na—na kati ya page.”

²⁶ Na yina mpangi ya munu ya bakala awa kwisaka, Mpangi Stanley, yandi kwisaka kuna; Évêque Stanley, mu zola tuba. Mpe mu zaba ve yina muntu yayi zola kutuba, mu. . . Ya vwandaka nkindusulu ya mutindu yina, ata mutindu yina. Yandi belamaka pene-pene ya lweka ya munu, mpe yandi tubaka, “Vwanda swi, mpangi-bakala, mu banza ti Nzambi ke sala kima mosi.” Beno me mona? Mpe yina ke pesaka munu ngolo, na kubanza ti yandi ke tuba yawu.

²⁷ Mu ke kukiyufula kana yandi bakulaka ti yandi pesaka profesi? Kasi mu vwandaka zonga na yandi mwa ntangu fyoti me luta, kaka ntete mu mata awa, mu ke kwikila ti yandi salaka.

²⁸ Na yina mu nataka yawu na Nsangu ya munu na zulu ya *Bampasi Ya Kubuta*, mpe nionso yina. Mpe mwa mutindu ya munu ya ngolo ya kusala yawu, samu na yina me tala lis; mpe mutindu ya me butuka mpe me buta, mpe me kwiza, mpe me benda mwini, kinoko, mpe nyonso yankaka yina. Mpe na yina kubeba ya yina ya fwana kufwa, samu na kubutuka na ngaanda, mu zola tuba, samu na kubasika. Mpe mu vwandaka meka na kusala kifwanukusu ya dibuundu.

²⁹ Kaka mutindu dokotolo awa, kana yandi kwendaka kusansa mbevo. Beto kele na badokotolo bubu yayi yina ke tuba, “Nge lenda nika dikulu ya nge, na manima ya dikulu ya yandi, mpe kubelusa cancer na kizizi ya nge, nge me mona.” Kasi dokotolo ya mbote lendaka ve kuwa kima ya mutindu yina. Yandi ke sala keba mbevo landila buku yina yandi ke na kutanga samu na kusosa-sosa ya medesine.

³⁰ Mpe ya kele mutindu mu ke mekaka na kusala na kusala keba mbevo. Ntangu mu ke mona dibuundu ya kubela, Mu zola ve kumeka kutuba na bawu ti bawu kele na nsatu ya kupesana maboko ya malu-malu to kima mosi, organisation ya malu-malu. Mu fwana sala yawu landila Buku yina mu—mu zaba, beno me mona. Mpe na yina ntangu mu ke monaka dibuundu, ke monana mutindu me baka kimbevo ya kasese, mu ke zola kubaka Mukanda ya munganga yina mu ke banza ti kele mbote, mpe samu na kasese, samu na kubasisa yawu na dibuundu; ntangu mu ke mona disumu kubasika na yawu, ya kele mutindu mosi!

³¹ Mu mekaka na kufwanikisa na Ésäü mpe Jacob, mpe na manima kukulumusa bantangu. Mpe mu ke kota ve na yawu. Kasi na kunataka yawu na kitini ya nsuka na kati ya Masonuku ya munu ya nsuka samu na kusadila, ba vwandaka fwanikisa

yawu, kukondwa masonuku, kasi mutindu Yesu tubaka ti ya ke vwanda, yina Dokotolo ya nene tubaka mutindu ya dibuundu zolaka vwanda, na bilumbu yayi ya nsuka, “Ya ke vwanda Laodicée, mvwama, mpofo, kinkonga, dibuundu ya mawa,” mpe ba ke fwanikisa yawu na bilumbu ya Sodome. Ntangu yayi, beto zaba ti ya kele Kieleka. Kana beno tala yawu, landila masolo, Yandi nataka na bilumbu ya Noé, ntete, mpe na manima na bilumbu ya Sodome. Mpe ya kele kaka mutindu yina ya me sala nzietolo, kaka mutindu mosi.

³² Mpe disolo, bambala mingi, ke vutukilaka yawu mosi, disolo ke salaka, mpe mutindu mosi ke salaka—ke salaka bansilulu ya Biblia. Mumbandu, mutindu na Matthieu 3, kisika ya me tuba, “Mu me bokila mwana ya Munu na ngaanda ya Egypte.” Ntangu yayi kana beno tala disonuku na zulu ya yawu, ya vwandaka Jacob, mwana ya Yandi, Yandi bokilaka na kubasika na Egypte; yina vwandaka mwana ya Yandi ya bakala ya nsuka. Kasi Mwana ya Yandi ya nene, Yesu, ba bokilaka yandi na kubasika na Egypte, mpe. Na yina ya vwandaka na mvutu ya mutindu na mutindu.

³³ Na yawu, mpe na kumonaka mutindu bawu vwandaka landila na kuzonzila yawu, mpe kuna mu nataka mabanza ya munu na yawu. Mpe mu basikaka na . . . mu basikaka na estrade, mpe mu kwendaka. Bana ya munu, vwandaka kwenda na yinzo, ba zolaka kutelama kisika mosi awa, samu na kusumba sandwich. Mpe mu kwendaka, kento ya munu tubaka, “Billy, mu vwandaka ya kudasuka mingi ti mu zabaka ve yinki ya kusala.” Yandi tubaka, “Mu pesaka nge Biblia yina.”

³⁴ Mu tubaka, “Ata mbala mosi ve ti nge sonikaka yawu, mpe ata mbala mosi ve ti nge tulaka yawu kintwadi, cherie.”

³⁵ Yandi tubaka, “Kasi, kaka samu na kubanza, mu—mu ke pesa nge Biblia yina vwandaka na foti na kati ya yawu.”

Mu tubaka, “Mbote, mu banza ti ya vwandaka ve mutindu yina.”

³⁶ Mpe na yina mosi ya bana zangulaka yawu, mpe beto vwandaka kuwa ba-page. Ve, ya vwandaka talana mbote mingi. Kasi kaka na yisi, ya vwandaka na ba-page zole ya kuvukana kintwadi, beno me mona, mpe kapu ya 16 vwandaka na lweka yayi, mpe na manima ndandani ya kapu ya 16 me kwisa na lweka yankaka. Mpe nzila ya 17 kubandaka . . . beno me mona, ya kele kaka kieleka ya kulunga, kieleka mutindu mosi, na lweka yankaka. Mpe papie ya Indien, ya fioti mingi, yina vwandaka ya kukangama kintwadi, mpe yina mu vwandaka tanga na kapu 17 ntangu nyonso, na kisika ya kapu 16.

³⁷ Mpe mu banzaka, “Nzambi, samu na yinki Nge salaka yawu? Samu na yinki ya ke vwanda na kima ya mutindu yina ntangu yayi?” Ya kele munu yina ke kuwaka, beno zaba, kumona yina yawu vwandaka nyonso, samu ti mu banza ti kima mosi ve ke

salamaka na siansi. Mpe mu vwandaka banza na yina me tala nkendusulu ya mpangi-bakala yayi awa, yina vwandaka kwiza, vwandaka tuba na munu, “‘Simba ngolo,’ yandi vwandaka nganga-Nzambi, ‘simba ngolo, mu banza ti Nzambi ke sala kima mosi,’” to kima mosi na mutindu yina. Mpe mu banzaka, “Wapi mutindu ya lendaka vwanda?”

³⁸ Mpe na yina, ya kuvwanda kuna, mutindu nzasi me katuka na Zulu yawu kwisaka na munu. Ntangu yayi, yayi lendaka vwanda ve na sense samu na beno, kasi ya ke sala munu, beno me mona.

³⁹ Mu ke bambuka moyo, na Luc kapu 4, ti Yesu kotaka na synagogue na Nazareth, kisika ba zangulaka Yandi, mutindu kikalulu ya Yandi samu na kukwenda na dibuundu na . . . synagogue, na Saba. Mpe ntangu Yandi salaka yawu, beto ke tala kuna ti nganga-Nzambi pesaka Yandi Biblia, Rouleau. Yesu, talaka na nzila ya Rouleau, monaka kisika mosi, Esaie 61, mpe Yandi tangaka Masonuku. Na yina Yandi vutulaka Biblia na longi. Mpe na yina mutindu Yandi balukaka na nkonga ya bantu, meso nionso vwandaka na zulu ya Yandi. Mpe Yandi tubaka:

. . . *Bubu yayi Disonuku yayi me lunga* . . .

⁴⁰ Mpe beto zaba wapi mutindu Masonuku yina vwandaka ya kuswaswana, samu ti Yandi bakaka kaka kitini ya banzila ya 1te mpe ya 2, ya Esaie 61:1 mpe 2. Kasi Yandi tangaka tii awa, kisika, “Mpeve ya Mfumu kele na zulu ya Munu, samu na kubomba bantima ya kulwala, mpe samu—samu na (kupesa) kubelusa bambevo, mpe kuzibula meso ya bampofo, mpe samu na kulonga mvula ya lemvo ya Mfumu,” na manima Yandi telemaka. Samu ti, yina vwandaka landa zolaka nata lufundusu; yina zolaka tula na Nkwizulu ya Yandi ya Zole, na nkwizulu ya Yandi ya ntete ve. Mpe Yandi telemaka, mpe balukaka, mpe tubaka, “Bubu yayi Disonuku yayi me lunga.” Wapi mutindu ya vwandaka kieleka!

⁴¹ Mpe wapi—wapi nsamunu ya vwandaka na milongisi mpe na bantu yina vwandaka kuna, ti Yandi lendaka kukumisa yayi pwelele na bantu, “Bubu yayi Disonuku yayi me lunga.” Samu ti awa Yandi vwandaka, Mesiya, kasi bawu kwikilaka yawu ve. Awa Yandi vwandaka, Yina ba pakulaka samu na ngunga yina. Konso kitini ya ministele ya Yandi, kubanda mbutukulu ya Yandi, lakisaka ti Yandi vwandaka yina Yandi vwandaka, mpe kasi bawu lendaka ve kukwikila yawu. Wapi nsamunu yayi! Kasi Yandi lendaka tuba bubu yayi . . .

⁴² Mpe kana muntu mosi me zibula meso ya bawu, ba lendaka zaba, na kuzabaka wapi kilumbu yina ba vwandaka zinga, samu ti yina vwandaka ngunga ya Yandi, samu ti Yandi vwandaka kaka kuna na kusalaka kieleka yina Masonuku, baprofete nyonso, tubaka ke salama na kilumbu yina. Awa Yandi vwandaka sala kieleka yina Nzambi pesaka profesi zolaka salama! Wapi mutindu bawu kondwaka na kumona yawu? Bawu

zolaka zaba kaka na nswalu, na kumonaka yina vwandaka ministele ya Yandi. Yina kele Mesiya. Bawu zolaka zaba yawu, samu ti Yandi tubaka, “Masonuku me lungisama.”

⁴³ Mu ke banza bubu yayi. Mpe beno tala yina ya vwandaka mutindu nganga-Nzambi pesaka Ndinga. Ndinga tangaka, vutulaka na nganga-Nzambi. Mpe masonuku ya nsuka yina mu kuzwaka, mpe Masonuku ya munu sonikaka, vwandaka Santu Luc 17:30, wapi kisika, Yesu ke talisa na kilumbu yayi yina beto ke na kuzinga, “mvwama, Nsungi ya Laodicée,” mpe ya kupola na politiki, dibuundu politiki mpe politiki ya yinsi, kaka ya kupola mutindu ya lendaka vwanda. Mpe na yina Yandi tubaka, “Mutindu ya vwandaka na bilumbu ya Lot, mutindu mosi ya ke vwanda na ntangu ya nsuka,” beno tala yina Yandi tubaka kuna, “na kilumbu yina Mwana ya muntu ke monisama.”

⁴⁴ Beno me mona, “Na bilumbu yina Mwana ya muntu ke monisama!” Mu zola benda bukebi ya nge.

⁴⁵ Beno me mona, Yandi kwizaka na bankumbu tatu. Yandi kwizaka mutindu Mwana ya muntu, yina vwandaka profete. Mpe ya kele yina Yandi salaka, Yandi siamisaka ministele ya Yandi, na kuvwandaka profete. Beto nyonso zaba yawu. Mosi na mosi ya beto zaba yawu. Yandi tubaka ata mbala mosi ve ti Yandi vwandaka Mwana ya Nzambi; Yandi tubaka ti Yandi vwandaka Mwana ya muntu. Ntangu yayi, bubu yayi, Yandi kele Mwana ya Nzambi, yina Yandi vutukaka, mpe ntangu yayi Yandi kele na mutindu ya Mpeve-Santu, Muntu yina ke monanaka ve; kasi dyaka, Nzambi, Mwana ya Nzambi. Na Millénium, Yandi ke vwanda na zulu ya Kiti ya kimfumu ya Tata ya Yandi, yina Yandi ke vwanda Mwana ya David. Yandi kukimonikisaka Yandi mosi ntete mutindu Mwana ya muntu, profete; nsungi yayi, na nzila ya nsungi ya dibuundu, Mwana ya muntu. . . to Mwana ya Nzambi; mpe na nsungi yankaka, Mwana ya David. Bana tatu!

⁴⁶ Kasi beno tala awa, Yandi tubaka, na nsuka ya nsungi ya dibuundu, ya kotaka na kati ya mvindu tii kuna Yandi ke monisama diaka mutindu Mwana ya muntu, “ntangu Mwana ya muntu ke monisama.” Ya kele mbote yina ke vukisa mazono! Mpe mu banza ti beno ke kondwa yawu ve.

⁴⁷ Beto kuzwaka luzayikisu ya Mwana ya Nzambi, kasi nsilulu ya nsuka yina Abraham kuzwaka ntete ba sala mwana. . . to ba kotisaka yandi na luzingu, yandi yina ba silaka yandi; ntete mwana ya nsilulu kulakisa, Nzambi monisamaka Yandi mosi kuna na Sodome mutindu Profete, na kuvwandaka Muntu, na nzutu, Nzambi. Elohim, mutindu mu kuwaka muntu kuzonza yawu ntama mingi ve, yina vwandaka Bunzambi na nzutu ya Yandi. Yandi vwandaka muvimba. Elohim kele kufuluka ya Bunzambi, na nzutu. Mpe beto ke tala kuna ntangu Lot monaka. . . Ntangu Abraham monaka Yandi kukwiza, yandi tubaka, “Mfumu ya munu.” Ya vwandaka na tatu ya Bawu. Mpe

kuna na Sodome, Lot monaka zole, mpe tubaka, “bamfumu ya munu,” kukondwa luzayikisu. Na yina beno tala yina salamaka awa, ntangu Yandi kwisaka, mutindu Yandi kukitalisaka Yandi mosi.

⁴⁸ Beto lendaka ve, mu lendaka tuba yayi ve kana mu vwandaka kaka na misapi ya munu, beno me mona, mpangi pesaka profesi ntangu yandi tubaka na munu yina yandi salaka! Bubu yayi! Beno tala mbote yina Yandi salaka kaka na manima ya kutanga ya Masonuku yina. “Na bilumbu ntangu Mwana ya muntu,” muntu ve, muntu ve, “Mwana ya muntu ke monisama Yandi mosi na kati ya bantu ya Yandi dyaka.” Bubu yayi nsilulu yayi, ya ngunga yayi yina beto ke na kuzinga ntangu yayi, me lunga na ntwala ya meso ya beto ya kieleka. Yandi balukaka mbala mosi na dibuundu, mpe kumi to kumi na zole, nyonso yina bantu ya vwandaka kuna, yina me zabana ve, Yandi salaka kaka kima mutindu mosi Yandi salaka na Sodome. Bubu yayi Disonuku yayi me monisama na ntwala ya beno. Ya me kuma kieleka na ntwala ya beno.

⁴⁹ Na yina, mpangi ya munu ya bakala, mpangi ya kento, bimonikisi, milongi, nyonso yina beto kele awa, bana ya Nzambi, wapi mutindu pene-pene beto kele na Nkwizulu ya Yandi kuna? Kana beto ke mona Masonuku yina Yandi silaka, kaka na ntwala tiya kubwa na Sodome samu na kuyoka yawu na tiya, mpe mutindu kilumbu yayi na yawu, mpe kumona Masonuku yango kaka ntete meso ya beto kulunga, wapi mutindu beto me kuma pene-pene na Nkwizulu ya Mwana ya Nzambi kuna? Wapi mutindu me kuma pene-pene kele kumonisama ya Masonuku, mutindu Yandi salaka na nzila ya Abraham, na kunataka Dibuundu, na kifwanukusu, yina Yandi vwandaka nsilulu ya Dibuundu! Mpe ntangu yayi beto ke mona ti, nkuna ya Abraham ya kimuntu, wapi mutindu bawu kondwaka. Kasi Nkuna ya Abraham ya kimfumu, yina kele na lukwikilu na Ndinga ya nsilulu, kele ntangu yayi me monisama na zulu ya ntoto bubu yayi. Beto me kuma na ntangu ya nsuka, mpangi ya munu ya bakala, bampangi ya bakento. Beto me kuma na nsuka.

⁵⁰ Mpe beto kele ve na kifwanikusu yankaka. Mu fwana fwanyikisa Masonuku samu ti mu me longukaka mingi ve samu na kubasisa bampova mpe nyonso. Mu ke salaka kifwanukusu. Kasi kana mu mona na bivudi . . . Kana mu me monaka ntete ve diboko ya munu, mpe kumona kivudi, mu zaba ti mu vwandaka na misapi tanu. Mpe ya kele mutindu beno fwana tala mbote Masonuku ke fwanyikisa Ngwisani ya Ntama. Yinki yawu ke salaka? Yawu ke zabisa na ntwala yayi. Mpe Yesu tubaka ti Sodome vwandaka talisa na ntwala ntangu yayi ya nsuka. Mpe Masonuku yina ba silaka na Sodome, Masonuku ya kieleka yina vwandaka salama na Sodome, ti Yesu tubaka ti ya ke salama dyaka yawu mosi na kilumbu yayi, ya me zabana kaka na ntwala ya beto bubu yayi.

51 Nzambi sakumuna nge. Beno kondwa yawu ve. Mpe kana mu mona beno ve awa mvula ke kwisa; ntangu ba ke mata Bimatinu ya Wolo, mu banza kukutana na beno Kuna. Nzambi sakumuna beno.

[Mpangi mosi ya kento ke na kuzonzaka na ndinga yankaka, mpe kuna yandi ke pesa lutendulu. Mpangi-bakala mosi ke kwisa na microphone mpe ke twadisa dibuundu na kuyimbaka *Yandi Ke Kwisa Ntama Mingi Ve*. Mambu ya mpamba na bande—Mu.]

52 Tata, beto kele...[Kisika ya mpamba na bande—Mu.] Landila Masonuku, beto ke mona me monisama, na ntwala ya beto, kidimbu ya nsuka mpe kifwanukusu. Bandinga ya Yesu Klisto tubaka ti yayi kele mutindu yina. Kaka mutindu ya vwandaka na Sodome, beto ke mona yinza na mutindu ya yawu, beto ke mona dibuundu na mutindu ya yawu, beto ke mona Musolami yina ba me bokila na kubasika na konso denomination; Luzingu, yina kele na bisika yina, ke basika ntangu yayi samu na kubaka kifwani ya Nkuna. Beto ke sambila, Tata ya Mazulu, ti beto ke vumbuka na nswalu.

53 Mutindu mpangi mosi ya bakala tubaka kaka ntangu yayi, yandi monaka ntete kizizi ya yandi, mpe ntangu yandi kangaka meso ya yandi, yandi vwandaka kwenda kaka na ntwala ya yandi. O Nzambi, beto ke kuwa ti ya kele na bimvuka yina me simbama ntete ve. Sadisa beto, Nzambi ya luzolo. Bika ti beto kwenda na lukutakanu yayi na mutindu ya kukebisa na kati ya ntima ya beto, na kuzabaka ti bubu yayi Disonuku me lunga. Na Nkumbu ya Yesu. Amen.

54 [Mpangi Demos Shakarian me tuba, “Alleluia. Nsoniki ya beto, Jerry Jensen, nge ke kwisa awa? Bokilo ya yandi—ya yandi ya kento me zimbisa mabanza, kieleka. Yandi me kuzwa kaka bansangu. Mpe bawu kele milongi ya Nsangu ya mbote, milongi ya Quatre coins. Beto lenda kaka...Yandi kele, mu zaba ti yandi kele na ntima ya nene. Mpe, mpe kaka...”—Mu.] Beno me bakula yawu kaka ntangu yayi, beno me kuwaka kaka ntangu yayi? [“Yinga.”] Bawu kele awa? [“Ve, bawu, bawu kele na Los Angeles. Na kati ya koma.”]

55 Kitamina ke salaka ve luswaswanu samu na Nzambi. Yandi kele Bisika nionso. Yandi fwana vwanda, samu na kuvwanda Nzambi. Mwa bima ya kulutila nene yina mu zaba me salama, na ministere ya munu mosi ya kukikulumusasa, kele na nzila ya allo-allo, to muntu mosi ke bokila, bima ya nene me salama. Bika ti beto wisana kintwadi ti Nzambi ke belusa bantu yayi yina kele ya kubela.

56 Tata ya Mazulu ya luzolo, beto ke nata bawu na Mvwandulu ya Nge, na nzila ya kisambu. Beto zaba ti na nkokila mosi ya vwandaka na ntumwa yina vwandaka ya kukangama na bisalu nionso na ntangu yina; yandi vwandaka na boloko mpe ba zolaka

zenga yandi yintu kilumbu yina vwandaka landa. Kuna na yinzo ya Jean Marc ba vwandaka na lukutakanu ya bisambu, mpe kaka na kati ya ba-cachot yango ya kati kuna kwizaka Dikunzi yina mosi ya Tiya yina vwandaka landa bana ya Israël, to bana ya Israel vwandaka landa Yawu na ntoto ya kuyuma; me kota mbala mosi, samu na lukutakanu yina ya bisambu, mpe me zibula konso kielo, mpe basisaka ntumwa na bala-bala diaka, na kimpwanza ya kulonga.

⁵⁷ Beto me bakula ti milongi yayi, ba-missionaire, kele ya kukangama na ntangu yayi, bawu kele—bawu kele mpe na koma. Mfumu, Nge kele mutindu mosi mazono, bubu yayi, mpe kukonda nsuka. Widikila kisambu ya beto na nkokila yayi, O Nzambi. Nge tubaka, “Ntangu nge ke sambila, kwikila ti nge me kuzwa yina nge me lomba, ya ke pesama na nge.” Mfumu, beto ke kwikila, mpe ke sambila ti na Nkumbu ya Yesu, ti Nge ke belusa bawu, Mfumu, samu na nkembo ya Nge. Ba me tuba, ba me yufula yawu, ntangu yayi bika yawu salama. Amen.

⁵⁸ Nzambi sakumuna nge, Jerry. Nge ke kwikila na yandi.

Mpangi Demos.

⁵⁹ [Mpangi Demos Shakarian me tuba, “Matondo na nge, Mpangi Branham, Jerry. Lukumu na Nzambi. Mu ke zola na nswalu nionso ti babakala yango kutelama. Mpangi Arganbright, mosi ya bantwadisi ya bayinsi nionso; telema, Mpangi Miner. Jack Moore, telema. Clifford Ford. Doerflein, ya Seattle. Charles Colonel Young. Enoch Christoffersen, Turlock. Jess Winemore. Ike Akamine, ya Hawaiian Islands. Oh, wapi mutindu ba me sakumuka! Wapi mutindu yandi me sakumuna mioyo ya beto awa, kilumbu yina. Mu ke zolaka yandi. Yandi kele kimonikisi ya beto ya Etats-Unis yina salaka na nsi ya luyalu ya ba-président sambwadi, Gerald Roll; William Roll, Nzambi sakumuna nge, mpangi-bakala. Dokotolo Ray Marlin...?...! Nzambi sakumuna Ray...?...! Earl Prickett.”—Mu.]

⁶⁰ [“Mpe ba me pesa Mpangi Branham kisika ya membele ya lukumu, luzingu ya mamebele ya lukumu, ya kulutila na zulu ya nkumbu ya yandi. Mpe mosi ya mwa bantu yina ba salaka voti, na nzila ya kimvuka ya bantwadisi, bamvula mingi me luta.]

Matondo na nge, mpangi-bakala.

⁶¹ [“Mpe Carl Williams, yina zolaka yandi mingi. Mpe Mpangi Henry Krause, musadi pusu. Jewel Rose, secrétaire-trésorier ya beto. Kisadi-bilanga, Frank Foglio, na kati ya...?...Mpe mu lenda ve kubanza na nge; mu lenda ve.” Mpangi mosi ya bakala me tuba, “Ya kele Derrick Fred.” Mpangi Shakarian me tuba, “Oh, Mpangi Derrick...?... , wapi mutindu beto ke sepela na ministere ya yandi! Oh, mpe mbote mingi, mpe—mpe mingi! Docteur Stanley, ya Canada, ya Canada esete.]

⁶² [“Mpangi Howard Ervin, mu me mona nge kuna na manima, Howard Ervin. Mpe beto zwaka kaka yina beno... Ya vwandaka

tata-kento yina...?....Beto vwandaka me telama kaka, mwa ntangu fyoti me luta, Howard, na yina nge vwandaka na bantwenya.]

⁶³ ["Mpe mu ke zola kumona foto yango ya Mpangi Branham, bamvula makumi zole me luta."] Huh!

⁶⁴ ["Mpangi Norwood, Mpangi Norwood me katuka na Kansas City. Mpangi Ben Smart ya Colorado. Herbert Bond, na Los Angeles, mosi ya bantwadisi ya Los Angeles, yandi salaka kisalu mosi ya nene kuna. Mpe Fred Watson, pasteur ya kuvwanda kuna, na nsongi. Wilson awa, mpe beto vwandaka ve na kisika mingi awa samu na yandi, na yina yandi vwandaka na bamama nionso. Mpe bamama nyonso awa kele bakento ya badileketele. Mpe beno nyonso bantu ya mbote!]

⁶⁵ ["Mu me kondwa muntu yankaka? Bayankaka ya bantwadisi zolaka vutuka na yinzo mazono. Darrell Hon...?....zolaka kwenda. Na yina beto lakisa bantu yayi beto ke sepela na bangolo ya bawu nionso, na ntangu yina. Amen. Mpe mu kondwaka muntu mosi ve.]

⁶⁶ ["Mpangi Branham. Kwisa awa, Mpangi Branham. Nge me zaba muntu *yina*?"]

Ve, tata. Nsobolo mingi kubanda bilumbu yina, bampangi.

["Kwisa awa, Howard.]

⁶⁷ ["Yandi vwandaka bakala mosi ya kitoko mingi, mpe yandi kele kaka kitoko, Mpangi Branham. Mpe yina kele kifwani ya mbote.]

⁶⁸ ["Mpe beto me kuzwa mitindu ya nge ya kutelama mwa ntangu fyoti me luta, mpe. Mpe mu banza ti nge ke zola kutuba mpova mosi, Howard."]

⁶⁹ [Mpangi Howard Ervin me tuba, "Na kati-kati ya bamvula kumi na zole mpe kumi na tanu me luta, Tata ya kento Edith belukaka na kimbevo ya Raynaud, yina mu ke bakula ti ya kele kimbevo ke belukaka ve na medesine. Mu zaba ve kana Mpangi Branham tubaka na beno mambu. Mpe mu ke kukiyufula kana mu lendaka baka kaka mwa ntangu fioti samu na kusala mutindu yina. *Yayi* kele kalati ya yandi yina kele na yandi samu na ndonga ya kubeluka. Yandi kotaka ata fioti ve na ndonga ya kubeluka ya nzutu. Yandi vwandaka, ya kuvwanda na ndonga ya zole, na kivinga yayi awa na Phoenix. Mpangi Branham longaka ntima ya yandi, yandi vwandaka sambila samu na bantu. Kasi na mbala mosi yandi talaka yandi, yandi talaka mbala mosi na yandi, mpe tubaka, 'Nge lenda beluka kana nge zola kuvwanda.' Mpe yandi basikaka na lukutakanu yina, belusaka, mpe yandi kele dyaka ya kubeluka."]

⁷⁰ [Mpangi Shakarian me tuba, "Ya vwandaka mpasi yina ke belukaka ve. Mutindu yina ve?"]

71 [Mpangi Ervin me tuba, “Yinga. Mu me bakula ti yina kele kimbevo yina ke belukaka ve. Mpe minganga ya beto awa ke tala munu; mu kele kapita ya medesine. Kasi mu me bakula ti ya kele kimbevo ya ba-nerf, yina ke salaka mpasi mutindu mosi na lèpre. Misisa ke kangama—kangama mpe ke zenga kutambula ya menga, mpe na nsuka misapi ke pola mpe ke kubwa. Ya vwandaka na lipaso mosi, ya chirurgien na Este, yina tubaka na bawu ti ba lendaka sala, mpe yina zolaka zenga nerf na kati *awa*; kasi, kana bawu vwandaka, yandi zolaka vwanza muntu yina ke kudiaka matiti. Kasi Nzambi, na nzila ya ngolo ya Yandi, me belusa yandi, mpe yandi me beluka bubu yayi.”]

72 [Mpangi Shakarian me tuba, “Beto telema diaka, na manima kuna.”]

[Mpangi Ervin me tuba, “Nge lenda telama, Tata-kento Edith?”]

73 [Mpangi Shakarian me tuba, “Mpe ya kele, bamvula makumi zole na manima.” Mpangi Ervin tubaka, “Bamvula kumi na tanu me luta.” Mpangi Shakarian me tuba, “Bamvula kumi na tanu na ntwala.” Mpangi Ervin tubaka, “Bamvula kumi na tanu me luta.”]

74 Matondo na Mfumu! Ya kele na muntu mosi yina bawu bikaka. Beto nionso ke sepela na Mpangi Shakarian. Mutindu yina ve? Beto nionso!

[Kisika ya mpamba na bande—Mu]. . .
 kuvwanda mutindu Yesu,
 Na zulu ya ntoto. . . kuvwanda mutindu Yandi;
 Nzyetolo ya luzingu ya muvimba, kubanda
 ntoto tii na Nkembo,
 Nionso yina mu ke lombwa, kuvwanda mutindu
 Yandi.

Beto sambila.


75 Tata ya mazulu, beto lenda kumona Nge na nkokila yayi ya kutelama na lweka ya kibaka mbala mosi mpe ke na kutalaka bantu ke kwisa kuna mpe ke tula na kati ya bumvwama ya Nzambi. Mpe Nge monaka kento yayi ya mufwidi kwisaka kuna na mwa ndambu ya mbongo, kaka mwa ba-centime ya makumi, mu banza vwandaka na mwa bana na yinzo, kasi yandi vwandaka sepela na Kimfumu. Ya kele ve na ntembe ti ba me fikula yawu dyaka na nkokila yayi. Ya vwandaka na bantu mingi yina tulaka, kaka nionso yina bawu kuzwaka awa na kati ya dikabu yayi, samu ba me tula yawu na ntwala ya beto, ti ya kele na nsatu, mpe bantima ya beto kele na kati ya yayi, Tata.

76 Mu ke banzaka bambala mingi, mu banza kana mu vwandaka ya kutelama kuna, ya vwandaka munu vwandaka tala mufwidi ya kento yina, Mu zolaka kwenda mbangu na yandi mpe kutuba, “Kusala yawu ve, mpangi-kento. Beto—beto ke na nsatu ya yawu ve.” Kasi mu banza ti ya zolaka vwanza luvunu. Ata

mbala mosi ve ti beno tubaka na yandi na kusala yawu. Beno vwandaka kaka ya kutelama mpe vwandaka tala yandi mbote kusala yawu, samu ti Nge zabaka na ntima ya yandi, Nge zolaka fulusa yandi samu na yawu.

⁷⁷ Tata, mu zaba ti Nge zaba bansatu ya konso ntima yina me tulama awa na nkokila yayi, mpe yina yawu kele. Ya kele samu na Kimfumu, Mfumu, ti . . .kisalu yayi yina beto me sepela na yawu mingi, mpe ngwisani yayi, Mfumu, ya ba-denomination nionso ya nene ya yinza. Beto ke kuwa ti beto kele bantu ya bweso na kuvwanda awa na nkokila yayi na Mvwandulu ya Nzambi, na kutalaka Ndinga yayi ya nene kukwiza mpe kulakisa, na kusiamisaka Nzambi na kuvwandaka na kati-kati ya beto!

⁷⁸ Nzambi, pesa mosi na mosi awa mutindu bawu kele na yawu nsatu. Beto ke sambila ntangu yayi ti Nge ke sakumuna dikabu samu na kisalu ya yawu. Beto ke lomba yayi na Nkumbu ya Yesu. Amen.

Nzambi sakumuna nge. 

65-0125 Bubu Yayi Disonuku Yayi Me Lunga
Kisika ya Kuyamba Banzenza Ramada Inn
Phoenix, Arizona U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutula mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutula mingi to samu na yina me tadila bisadulu, beno sonikila:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org